



Nos Libertador Gilberto F. Croes

Betico Croes,
e inolvidabel amigo y luchado,
cu a stima su pais
y a bai den historia como libertador di Aruba.

Betico Croes,
e homber inalcansabel
Un persona cu a traha pa su pueblo
cu honor, cariño y amor cu e tabata sinti
pa nos como Arubiano.

Betico Croes,
kende tabata un persona hopi stima pa su pueblo.
El a lucha duro pa su pais Aruba.
E tabata un homber balente.
Prome cu tiro di aña 1986,
sin por a spera cu e dia lo yega
pa nos incansabel Betico Croes.

Betico Croes,
lagrima a basha infinitamente for di nos wowo,
ora nos, unda cu nos tabata, a tende e tristo noticia
sin por a kere y spera, cua Aruba su gran yiu di tera
tabata bai separa su mes di su hendenan
cu tanto a stim’e y apreci’e.

Betico Croes,
nos palabranan ta corto,
pero semper gradici na bo,
sin por a spera cu e dia scur tabata cercano
pa un Arubiano cu si a sa di lucha
pa su isla Aruba asina stima,
di cual su anhelo y ferviente deseo pa Aruba
haya Status Aparte a wordo cumpli.

Betico Croes,
sikiera bo a mira pa algun minuut
mas di cerca e Status Aparte
cu tanto bo a anhela pa nos dushi Aruba.
Nos curazon a wordo conmovi
pa e tragedia lamentabel
pero si nos ta aprecia bo amor, balentia y curashi.
Ainda den nos curazon semper bai
lo bo ta e gran libertador di Aruba.

Betico Croes,
aunke bo no tei mas cerca nos,
e distancia entre nos no ta grandi y largo.
Abo, cu tabata un gran politico Arubiano
tabata stima bo pueblo,
pober y rico.

Betico Croes,
abo tabata un hende di bon curazon
cu semper tabata sa con y ki ora
pa defende e patria Aruba.
Abo a lucha cu sodo di bo frenta
pa e deseo tan anhela di bo pueblo aprecia.

Betico Croes,
ken por a pensa,
cu bo despedida tabata asina cerca ?
Bo tabata un politico cu semper tabata tin oido
y semper tabata tin bo pueblo na pecho.

Betico Croes,
awor cu bo ta den cas celestial
nos lo keda recorda bo den oracion.
Lo bo keda den historia di Aruba
como e amigo inolvidabel,
como e luchado inigualabel
y e Libertador di pais Aruba.
Lo no tin otro pa reemplaza bo,
pasobra den nos curazon
t’abo ta e Libertador di Aruba.

Clarette Quandus